



საქართველოს მთავრობის გ ა ნ კ ა რ გ უ ლ ე ბ ა

N1478 2022 წლის 15 აგვისტო ქ. თბილისი

„2022 წლის რთვლის ორგანიზებულად ჩატარებისათვის
განსახორციელებელი ღონისძიებების შესახებ“ საქართველოს მთავრობის 2022
წლის 25 ივლისის №1327 განკარგულებაში ცვლილების შეტანის თაობაზე

საქართველოს ზოგადი ადმინისტრაციული კოდექსის 63-ე მუხლის
შესაბამისად, „2022 წლის რთვლის ორგანიზებულად ჩატარებისათვის
განსახორციელებელი ღონისძიებების შესახებ“ საქართველოს მთავრობის 2022
წლის 25 ივლისის №1327 განკარგულებაში შეტანილ იქნეს ცვლილება და
განკარგულებას დაემატოს შემდეგი შინაარსის მე-7 – მე-19 პუნქტები:

„7. „საქართველოს 2022 წლის სახელმწიფო ბიუჯეტის შესახებ“
საქართველოს კანონით გათვალისწინებული „მევენახეობა-მეღვინეობის
განვითარების პროგრამის“ (პროგრამული კოდი: 31 03) „რთვლის
ხელშეწყობის ღონისძიებების“ ქვეპროგრამით (პროგრამული კოდი: 31 03 05)
გამოყოფილ ასიგნებათა ფარგლებში, სააგენტომ, მევენახეობის სფეროში

დასაქმებული ფიზიკური პირების მიერ მიღებული ყურძნის მოსავლის რეალიზაციის ხელშეწყობის მიზნით, უზრუნველყოს ყურძნის ჩამბარებელი ფიზიკური პირებისგან (შემდგომში – ყურძნის ჩამბარებელი) კახეთის რეგიონში მოწეული 1 კგ ყურძნის შესყიდვის სანაცვლოდ ღვინის კომპანიებზე სუბსიდიის გაცემა შემდეგი ოდენობით:

- ა) 1 კგ რქაწითელისათვის – 0,35 ლარი;
- ბ) 1 კგ კახური მწვანისათვის – 0,35 ლარი.

8. კახეთის, რაჭა-ლეჩხუმისა და ქვემო სვანეთის რეგიონებში მოწეული ყურძნის ჩაბარება/მიღება რთვლის მიმდინარეობისას განხორციელდეს მევენახეობის შესაბამის ზონაში სააგენტოს მიერ გაცემული მევენახეობის კადასტრის ამონაწერის საფუძველზე.

9. ეთხოვოთ მუნიციპალიტეტებს, რომლებიც არ ეკუთვნიან კახეთის, რაჭა-ლეჩხუმისა და ქვემო სვანეთის რეგიონებს, მათ მიერ შემუშავებული ფორმის შესაბამისად, ყურძნის ჩამბარებლებზე ყურძნის წარმოშობის შესახებ ცნობების გაცემა.

10. ეთხოვოთ ახმეტის, გურჯაანის, ყვარლის, დედოფლისწყაროს, თელავის, ლაგოდეხის, საგარეჯოს, სიღნაღის, ამბროლაურისა და ცაგერის მუნიციპალიტეტებს, საჭიროების შემთხვევაში, უზრუნველყონ, სააგენტოს მიერ შემუშავებული ფორმის შესაბამისად, ყურძნის ჩამბარებლებზე ყურძნის წარმოშობის შესახებ ცნობების გაცემა.

11. რთვლის მიმდინარეობისას ყურძნის ჩაბარების/მიღების პროცესის ორგანიზებულად წარმართვის მიზნით:

- ა) კახეთის რეგიონში მოწეული რქაწითელისა და კახური მწვანის ჩაბარება/მიღება შპს „მოსავლის მართვის კომპანიაში“ (ს/კ: 405406109) განხორციელდეს შესაბამისი მუნიციპალიტეტის მიერ ყურძნის ჩამბარებლებზე გაცემული ყურძნის წარმოშობის შესახებ ცნობის შესაბამისად;
- ბ) კახეთის რეგიონში მოწეული ყურძნის ჩაბარება/მიღება ღვინის კომპანიების მიერ განხორციელდეს ჩამბარებლებთან შეთანხმებული

ინფორმაციის (ყურძნის ჩამბარებელი, ჩასაბარებელი ყურძნის ჯიში და რაოდენობა, ყურძნის ჩაბარების ადგილი და დრო) პორტალზე – portal.wine.gov.ge განთავსების შემდგომ.

12. ამ განკარგულების მე-7 პუნქტში მითითებული სუბსიდიის მიღების უფლება აქვს მხოლოდ იმ ღვინის კომპანიას, რომელსაც დაცული აქვს ამავე განკარგულების მე-4 პუნქტით გათვალისწინებული პირობები და რომელიც:

ა) ყურძნის მიღება-გადაამუშავების პროცესის დაწყებამდე სააგენტოსთან გააფორმებს ხელშეკრულებას (შემდგომში – ხელშეკრულება);

ბ) 2022 წლის რთვლის განმავლობაში შეისყიდის და გადაამუშავებს კახეთის რეგიონში მოწეულ არანაკლებ 100 (ასი) ტონა რქაწითელის ან/და კახური მწვანის ჯიშის ყურძენს;

გ) შესყიდული 1 კგ რქაწითელის ან/და კახური მწვანის ჯიშის ყურძნის სანაცვლოდ ყურძნის ჩამბარებელს გადაუხდის არანაკლებ 0,90 ლარს;

დ) 2022 წლის 1 დეკემბრამდე სააგენტოს წარუდგენს:

დ.ა) ყურძნის ჩაბარების თაობაზე ყურძნის ჩამბარებელსა და ღვინის კომპანიას შორის გაფორმებულ მიღება-ჩაბარების აქტს, რომელსაც ხელს აწერენ საქართველოს გარემოს დაცვისა და სოფლის მეურნეობის სამინისტროს/სააგენტოს, ღვინის კომპანიის უფლებამოსილი წარმომადგენლები და ყურძნის ჩამბარებელი;

დ.ბ) ყურძნის ჩამბარებლისთვის/ჩამბარებლებისთვის რქაწითელის ან/და კახური მწვანის ჯიშის 1 კგ ყურძნის შესყიდვის სანაცვლოდ არანაკლებ 0,90 ლარის გადახდის დამადასტურებელ დოკუმენტაციას.

13. იმ შემთხვევაში, თუ ღვინის კომპანიას არ აქვს დასრულებული ყურძნის მიღების პროცესი და სააგენტოსათვის წარდგენილ განზრახვაში დაფიქსირებული აქვს არანაკლებ 100 (ასი) ტონა ყურძნის – რქაწითელის ან/და კახური მწვანის მიღების შესახებ ინფორმაცია, მას უფლება აქვს, მიიღოს სუბსიდიის თანხა, რისთვისაც ღვინის კომპანია ვალდებულია, 2022 წლის რთვლის მიმდინარეობის პროცესში წარადგინოს „საქართველოს ეროვნული

ბანკის შესახებ“ საქართველოს ორგანული კანონის შესაბამისად კომერციული ბანკის მიერ სააგენტოს სასარგებლოდ გაცემული საბანკო გარანტია (ბენეფიციარი – სააგენტო), რომლის ოდენობაც 10%-ით უნდა აღემატებოდეს ღვინის კომპანიის მიერ მისაღები სუბსიდიის თანხას.

14. ღვინის კომპანიაზე ამ განკარგულების მე-7 პუნქტში მითითებული სუბსიდია გაიცემა ამავე განკარგულების მე-12 და მე-13 პუნქტებით გათვალისწინებული დოკუმენტაციის სააგენტოში წარდგენიდან 15 სამუშაო დღის ვადაში.

15. ღვინის კომპანიის მიერ, ამ განკარგულებისა და ხელშეკრულებით გათვალისწინებული პირობების შეუსრულებლობის შემთხვევაში, ღვინის კომპანიის მიმართ მოთხოვნის უზრუნველყოფის მიზნით, სააგენტოს სასარგებლოდ გაცემული საბანკო გარანტიის თანხა სრულად მიემართება სახელმწიფო ბიუჯეტში.

16. ღვინის კომპანიების მიერ ყველა კატეგორიის ღვინის წარმოება დასაშვებია მხოლოდ რთვლის საკოორდინაციო შტაბის მიერ აღრიცხული ყურძნისაგან.

17. დაცული ადგილწარმოშობის დასახელების ღვინოების დასამზადებლად განკუთვნილი ყურძნის ჯიშის მოსავლიანობა 1 ჰა ვენახიდან განისაზღვროს ამ ღვინისათვის დადგენილი წარმოების სპეციფიკაციის მაჩვენებლის შესაბამისად.


18. ღვინის კომპანია ვალდებულია:

ა) უზრუნველყოს ყურძნის ყოველდღიური მიღების განზრახვის შესახებ ინფორმაციის მიწოდება რთვლის საკოორდინაციო შტაბისათვის;

ბ) მოახდინოს ყურძნის გადამუშავების შედეგად დარჩენილი ჭაჭის გამოხდა ან მისი სხვა სახით გამოყენება/განადგურება და არ დაუშვას ჭაჭის ფიზიკური პირებისთვის გადაცემა.

19. ეთხოვოთ თვითმმართველი ქალაქების ადმასრულებელ ორგანოებს 2022 წლის რთვლის პერიოდში, ყურძნის რეალიზაციის ხელშეწყობის მიზნით, შესაბამისი ადგილების გამოყოფა.“.

პრემიერ-მინისტრი



ირაკლი ღარიბაშვილი